

四庫全書

集部

欽定四庫全書

梁谿集卷三十七

宋 李綱 撰

擬制詔三

制二十首

門下侍郎除特進知樞密院

東臺出命久隆獻替之風右府本兵實總樞機之任眷
我近弼為時蓋臣宜錫命書往膺盛選具官某醇深而
莊重寬厚而剛方問學高明潛天人之極致材器宏遠

備文武而咸宜自結眷知薦歷華要擢參陪於幾務益
茂著於忠勤告辰猷而具臧秉一德而不爽言可底績
知無不為以儒術之淵源達兵家之形勢智謀深博可
以運籌帷幄之中聲名隱隆可以折衝廟堂之上朕心
所屬輿論攸歸疇咨弼亮之材延登宥密之地峻陞文
秩申衍戶封庸示龍光式昭體貌方今邊陲聳動西有
跳踉之戎中夏抗衡北有強黠之敵賴爾經制紓予顧
憂徃惟既於厥心以對揚於休命

中書侍郎除門下侍郎

朕誕膺景命祇紹先猷慎簡左右執政之臣同底寅亮
格天之業乃眷左省實本萬幾延登偉材協贊丕績肆
頒命綽敷告朝紳具官某函量粹夷稟氣剛大學貫古
今而懿文足以華國智周事物而厚德足以鎮浮蚤被
眷知徧歷清近擢陪幾務之要益殫夙夜之勤贊治內
書茂著股肱之美出納朕命備宣喉舌之勞疇其勲庸
宜有褒陞進貳東臺之峻式昭眷禮之優朕方體道以

就功量材以授職出命尤資於審慎用人務極於公忠
顧惟論駁省讀之司宜有獻替將明之益往服朕訓永
孚于休

尚書左丞除中書侍郎

朕嗣承丕緒祇邁先猷永惟幾務之繁實賴股肱之助
若時政本莫重西臺非得同此一德之臣曷致協恭和
衷之效肆頒明命登進宏材具官某敦厚而裕和高明
而博達淵奧之學足以謀王體典麗之文足以爲國華

蚤以明揚踐更膺仕擢總綱轄參陪政機屢陳宸告之
猷益勵匪躬之節率六官而合治致庶績之咸凝興情
具瞻朕心簡在疇其勲業宜有褒崇是用擢自蘭臺進
貳鳳閣惟命令出納之地迺政事弛張之原率由憲章
爾其念敷奏之審旁招俊乂爾其思進擬之公往盡乃
心務稱厥職惟予以懌汝亦有辭

尚書右丞除尚書左丞

文昌政事之原丞轄紀綱之任協贊庶務總齊百工必

得同心一德之臣共濟持盈守成之業肆頒明命登進
宏材具官某器度粹夷性資莊重富淵源之碩學有經
綸之遠猷自結眷知參陪幾務謀王體而斷國論亮邦
采而熙天工厥職允修外則率六卿以倡九牧其德不
爽內則貳三事以毗一人疇其勲績之多宜有寵褒之
數位以叙進擢陞左轄之司功以志崇更勵匪躬之節
往服朕命永觀厥成

吏部尚書除尚書右丞

朕光紹丕基祇邁先烈惟執政大臣所以圖回萬幾於
廟堂之上者非瑰偉博達之材不以輕付膺此選者顧
不重哉具官某器量凝遠識慮敏明文章之懿足以為
國華議論之純足以謀王體蚤膺眷遇寢歷禁嚴居言
語侍從之班有獻納論思之益頃自翰苑擢任天官銓
衡有方風績彌劬休有譽處恬然靖共其由八座之聯
進登二府之列蔽自朕志穆于師言夫文昌政事之原
丞轄紀綱之任康濟庶務總齊百工惟同寅協恭足以

盡替襄之美惟獻可替否足以起治功之隆往既乃心
同底于道

翰林學士除吏部尚書

周建六卿天官掌羣吏之治漢分八座選部考百官之
成必資清恪之材克稱高華之選往踐厥服我得其人
具官某識度粹夷風猷敏劬蘊淵源之碩學富典麗之
雄文蚤以明揚荐膺器使居言語侍從之列有獻納論
思之忠自處禁林益攄素蘊議論該洽入告於燕閒號

令溫醇有古之風烈疇其聞望宜有褒陞是用擢由翰
墨之司付以權衡之任綜三銓之政令為六曹之表儀
朕方體道以就功循名而責實一官闕則一事廢爾其
為官而擇人庶事舉則庶績熙爾其量材而授職振肅
綱紀俾猾吏有畏縮之心甄別賢能致寒士無滯淹之
歎時為稱職則予汝嘉

戶部尚書

洪範八政實先食貨之功周官六卿尤重版圖之任惟

國家經費之廣與戶口生齒之多典在民曹號為劇部
欲稱高華之選必資精敏之材爰錫贊書以光茂舉具
官其器量宏遠識慮強明學足以通今古之原智足以
周事物之變踐揚臚仕寔歷從班藹然俊偉之聲卓爾
靖共之操論思忠謹有尊君享上之誠籌畫疏通有足
國愛民之術擢由橐從進長版曹式資心計之優以總
邦財之裕朕方理財以義爾無掊克以動民心制用適
宜爾無削弱以傷國體惟察懋遷有無之理以行闔關

斂散之權取予有方公私與足克修厥職時乃之休

禮部尚書

昔舜命伯夷以典禮命夔以典樂教胄子而周官宗伯之職皆兼掌之朕纂紹丕圖祇遵先烈樂在大晟禮在奉常教養之法在學校而尚書禮部實總其政令職任清重為六曹最分職率屬尤難其人以爾具官某直諒多聞溫恭有恪淵源之學足以謀王體典麗之文足以為國華居言語侍從之班有獻納論思之益秩宗之任

莫如汝宜其自貳卿之聯擢陞八座之列朕方制禮作樂起太平之彌文尊道崇儒善天下之風俗爾其往踐厥服慎率乃僚使情文著明足以格神人之治而教法推廣足以得譽髦之材夙夜惟寅無替朕命則予一人以懌爾亦永世有辭

兵部尚書

周建六卿司馬掌九伐之法魏分八座尚書有五兵之曹惟是夏官實總軍政克稱高華之選必資俊偉之臣

具官某器量恢宏性資莊重學博而守之以約材全而用無不宜蚤被眷知浸階華近獻納勵匪躬之節靖共懷難進之風其由從橐之聯往陟本兵之地蔽自朕志穆于師言朕方除戎器以戒不虞續武功以討有罪以號令之嚴統制諸將以符璽之信更戍重兵資爾推行副予注倚修車馬備器械以奮張於軍容平邦國統六師以折衝於外侮時汝之職其往欽哉

刑部尚書

舜命臯陶明五刑以作士周建司寇掌三典以佐王必
資膚敏之臣以稱教中之任歷選在位我得其人具官
某莊重而裕和簡嚴而博達學貫古今之要智周事物
之幾蚤被東求踐揚臚仕出受藩宣師帥之寄政事惟
醇入居言語侍從之班聲華彌劬有剛明之材足以詰
姦慝有仁厚之德足以矜無辜惟其威恕之並行宜副
欽恤之美意是用擢由橐從進長憲曹以承靈制之祥
刑以讞攸司之疑獄朕方推好生之德致囹圄之屢空

明約法之章若江河之難犯辟以止辟刑期無刑爾其
慎率乃僚祗若予訓不出輕而入重以公滅私不吐剛
而茹柔惟明克允俾四方之風動使天下無冤民則予
汝嘉時為稱職

工部尚書

朕惟周建六卿冬官實掌邦事飭材辨器度土居民凡
百工之職悉總之今工部其任也能稱厥職實難其人
具官某資識開明器量宏遠淵源之學足以知治體膚

敏之材足以起事功蚤被眷知寢階華近居言語侍從之列有獻納論思之忠恬然靖共休有譽處其自貳卿之秩進登八座之聯分職事官率屬起部若保定辟無廢舊章稽功勒名厥有成憲昔帝舜疇若予工而垂之竹矢為後世所寶漢宣總核名實而百工技巧咸精其能往盡厥心無俾專美則朕以懌汝亦有辭

御史中丞除吏部尚書

憲臺執法久推彈糾之風選部掄材擢領銓衡之任陞

華要劇允屬老成宜錫贊書以光茂舉具官某溫恭而
颯亮敦厚而直方學有淵源博極古今之要行無表襮
率循防範之中自結眷知踐揚華近頃由橐從之列付
以風憲之司糾正官邪推明國是知朝廷之大體竭耳
目之攸司嘉乃忠純宜有褒顯是用擢從烏府進長天
官為六曹之表儀綜三銓之政令朕方循名而責實體
道以就功爾其為官而擇人量材而授職振肅綱紀俾
猾吏有畏縮之心甄別賢能致寒俊無滯淹之歎時為

稱職則予汝嘉

翰林學士除兵部尚書

周建六卿司馬掌九牧之法魏分八座尚書有五兵之曹惟大事之在戎肆設官之尤重欲稱茲選必得其人具官某博洽而敏明溫恭而直諒蚤以儒術揚于禁林西掖代言藹著論思之美北門視草雅資潤色之功嘉謀閱議足以啟沃朕心大冊高文足以鼓動當世材無施而不可學有本而皆通其由翰墨之司往膺政事之

任擢長武部率屬秋官朕方除戒器以戒不虞續武功
以討有罪以號令之嚴統制諸將以符璽之信更成重
兵資爾推行副予注倚修車馬備器械以奮張於軍容
平邦國統六師以折衝於外侮時汝之職往其欽哉

開封尹除刑部尚書

舜命臯陶明五刑以作士周建司寇掌三典以佐王必
資秉哲之材以稱教中之任往踐厥服我得其人具官
某莊重而裕和簡嚴而博達學貫古今之要智周事物

之幾蚤被眷知踐揚膺仕擢總浩穰之政久推彈壓之風有剛明之材以震服於豪右有仁厚之術以牧養於細民惟其威恕之並行宜副欽恤之美意是用擢從天邑進長憲曹以承靈制之祥刑以讞攸司之疑獄朕方推好生之德致囹圄之屢空明約法之章若江河之難犯辟以止辟刑期無刑爾其慎率乃僚祗若予訓不出輕而入重以公滅私不吐剛而茹柔惟明克允俾四方之風動使天下無寃民則予汝嘉時乃稱職

太常少卿除禮部侍郎

棘寺置卿雅重奉常之選蘭臺合治尤高宗伯之司肆
疇俊偉之材以明因任之道往踐厥服必惟其人具官
某器質端莊文辭博敏揚歷中外之久雅著靖共之稱
頃由郎曹擢貳寺政贊相禮儀之事雍容可觀討論郊
廟之文淵源有據肆頒明陟之典往參春官之聯蔽自
朕心穆于師論朕方制禮作樂起太平之彌文尊道崇
儒善天下之習俗具有政令資爾推行惟率乃僚以佐

厥長曲盡情文之致茂宣夙夜之勤勉修厥官無替朕命

給事中除戶部侍郎

鸞臺寓直久推論駁之風蘭省陞華擢佐版圖之政誕揚明陟之典登進端良之材爰錫贊書往踐厥服具官某器資莊重識慮敏明學足以道古今之原智足以周事物之理蚤膺東擢寔歷從班藹然俊美之聲卓爾靖共之操論思忠謹有尊君享上之心籌畫䟽通有足國

厚民之術輟從左省往貳民曹式資心計之優以總邦財之裕朕方理財以義爾無掊克以動民心制用適宜爾無削弱以傷國體惟察懋遷有無之理以行闔闢散斂之權取予有方公私與足時為稱職嗣有寵褒

殿中監除工部侍郎

朕惟周建六卿冬官實掌邦事飭材辨器度土居民凡百工之職悉總治之今工部其任也宜得通材往貳厥政以爾具官某器度凝遠智識敏明席世胄之高華藹

搢紳之譽望擢司盾省厥職允修肆疇爾勞陞華起部
貳卿之列其任匪輕昔舜疇若予工而垂之竹矢為後
世之所寶漢宣總核名實而百工技巧咸精其能朕甚
慕之其率乃僚以佐厥長興事就功無俾前人之專美
是為稱職嗣有寵褒

翰林學士除承旨

視草北門克著論思之益陞華東閣式昭寵遇之優我
有俊臣宜膺妙選具官某器度凝遠資識敏明有經世

之宏材有博古之奧學蚤蒙識擢寢歷清華由言語侍
從之班司翰墨文章之任入奉清閒之燕每輸獻納之
忠嘉言閎議足以啓沃朕心大冊高文足以鼓動當世
休有譽處恬然靖共惟潤色久留于禁林宜顧問獨承
於密旨爰舉褒陞之典以明因任之方穆于師言蔽自
朕志爾其摠發素蘊益宏遠圖使號令溫醇無愧兩漢
之烈訓辭灝噩有周三代之風則予汝嘉時為稱職

中書舍人除翰林學士


西掖代言藹士林之令望北門視草極儒者之至榮必
資俊偉之材克稱清華之選往踐厥服我得其人具官
某資識敏明器量渾厚夙富淵源之學發為典麗之文
自策賢科寢階膺仕被東求之眷禮聯侍從之清班恬
然靖共休有譽處論思獻納秉一節以周旋號令文章
有三代之風烈朕心所屬輿論攸歸是用擢自右臺進
司內制仰惟前代擅金鑾之寵榮稽厥本朝有玉堂之
故事惟周密足以盡贊襄之美惟體要足以昭潤色之

功其究乃心毋煩予訓

吏部侍郎除工部尚書

叙正羣吏久登小宰之聯疇若予工以定司空之辟東
自貳卿之列擢陞八座之崇必惟其人乃稱茲選具官
某性資純茂智識敏明文足以為國華學足以謀王體
蚤躋膴仕旋陟從班論思可觀獻納惟允自總銓衡之
政益殫夙夜之勤藹然聲華休有譽處其自天官之貳
往率起部之僚蔽自朕心穆于師論朕方總核名實欲

技巧咸精其能爾其訓勵百工使制作悉遵于法無替
朕命往圖厥成



梁谿集卷三十七

欽定四庫全書

集部

梁谿集卷

三六至
四十

詳校官庶吉士臣張溥

侍讀臣孫球覆勘

總校官知縣臣楊懋珩

校對官編修臣王天祿

謄錄監生臣陶紹侃

欽定四庫全書

梁谿集卷三十八

宋 李綱 撰

擬制詔四

制二十七首

大司成除翰林學士

禁林翰墨之司學士清華之任修飾潤色實資視草於
北門獻納論思自昔號稱為內相極一時之妙選為儒
者之至榮我有俊臣宜膺茂舉具官某器度凝遠資識

敏明宏材懿行足以羽儀本朝大冊高文足以鼓動當
世踐揚禁近被遇眷知由侍從之邇聯總師儒之要職
推行教法茂宣夙夜之勞作成人材藹集譽髦之士朕
心所屬輿論攸歸是用擢自學宮進司翰苑職清地近
極金鑾之寵榮禮渥眷優有玉堂之故實惟朝廷之政
事咸得以與聞使號令文章有古人之風烈是惟稱任
往既厥心

給事中除大司成

朕樂育天下之材恢庠序於海寓發明先聖之教合儒
道於學宮必資雅望之臣以總成均之政歷選在位爰
得其人具官某直諒多聞靖共有守智足以知聖人之
道文足以為學者之宗頃被明揚薦躋華要代言西掖
訓辭有灝噩之風列職東臺議論極忠嘉之益方師儒
之虛席非老成而易居莫如汝宜其為朕往惟京師首
善之地而學校賢士之闕英俊並游道藝為考法令完
具皆朕制作之規賢能賓興資爾推行之力務稱圖任

嗣有寵褒

給事中

朝廷號令政事無有大小咸得與聞可則審讀而推行
否則封駁而論列給事中之職也其任顧不重哉苟非
其人朕不輕付以爾具官某器度凝遠操履端方智足
以周事物之情學足以知國家之體蚤膺識擢寢歷清
華恬然靖共休有譽處論思之職莫如汝宜夕拜瑣闥
肆以命汝夫與聞國論而得行其所知此固汝之所學

而欲行之者也無詭隨以避事無激訐以沽名惟既厥
心務稱朕意

中書舍人除給事中

西掖代言蔚士林之雅望東臺夕拜為儒者之至榮必
資俊偉之材克稱清華之選往踐厥服我得其人具官
某資識敏明器度宏遠夙富淵源之學發為典麗之文
自結眷知致身禁近論思獻納秉一節以周旋訓誥文
章有三代之風烈朕心所屬輿論攸歸是用擢秀紫微

陞華青瑣賞刑未允實資論駁之風號令具臧更賴審
覈之力惟周密足以盡贊襄之美惟公忠足以杜邪枉
之門往既乃心毋煩予訓

中書舍人

官聯右省職在代言非特取其文章資修飾潤色之美
實使與聞政事有獻納論思之功必得其人乃稱茲選
具官某器識凝遠風度粹夷學足以知古人之心智足
以周當世之務蚤膺東掖寢歷清華藹然俊偉之聲卓

爾靖共之操比從給札試以贊書嘉其典麗之文克備
坦明之制擢參法從列職西臺惟三代之訓辭極灝噩
之體而兩漢之號令有溫雅之風徃既乃心無愧於古
副朕眷倚嗣有寵褒

起居舍人除中書舍人

西臺列屬峻清居言語侍從之班有獻納論思之任欲
稱茲選必惟其人具官某直諒多聞靖共有守富淵源
之碩學挺瑰偉之宏材蘭省為郎久推雅望螭坳載筆

密侍清光寢歷歲時休有譽處比從給札試以贊書嘉其典麗之文克備坦明之制擢參橐從往代予言惟三代之文章極灝噩之體而兩漢之號令有溫雅之稱當時服其訓辭後世想其風烈朕甚慕此爾其勉之惟既厥心無愧于古

中書舍人除御史中丞

御史府不置大夫則中丞實為之長總率臺屬董正朝綱風憲之司耳目所寄厥任尤峻必惟其人具官某志

操端方器度凝遠有勁正之氣而不畏強禦有明敏之
識而練達事機蚤以明揚薦躋華要居言語侍從之列
有獻納論思之忠恬然靖共休有譽處蔽自朕志擢長
南司聿資搏擊之材以肅紀綱之地朕方循名而責實
體道以就功欲百吏之得人致四方之風動爾其推明
國是糾正官邪使朋黨壞植而散羣姦回心沮而膽落
克稱中執法之任不愧古司直之風則予一人以寧爾
亦無窮之聞

侍御史除御史中丞

御史府不置大夫則中丞實為之長總率臺屬董正朝
綱風憲之司耳目之寄厥任尤峻必惟其人具官某趣
操端方器度凝遠有勁正之氣足以配昔人之賢有明
敏之材足以周當世之務頃由卿寺擢貳臺端屢陳忠
謹之言助予視聽之廣議論黻亮朋黨壞植而散羣彈
劾公方姦邪心沮而膽落中立不倚直道無私不吐剛
而茹柔期遏惡而揚善蔽自朕志進長南司以明因任

之方以肅紀綱之地朕方循名而責實體道以就功欲庶官之得人俾四方之風動爾其推明國是糾正官邪進思盡忠無憚大吏克稱中執法之任不愧古司直之風則予一人以寧爾亦有無窮之聞

開封尹

京邑所都雅有浩穰之目輦轂之下必以彈壓為先肆求偉材總治劇務歷選在位我得其人具官某資識端方器度閑遠學洞古今之蘊智周事物之幾繇歷清華

諒著風績有嚴重之威足以震服豪右有寬厚之政足以牧養細民蔽自朕心擢任天府夫四方之所聚會故多桀黠之民百貨之所阜通故多爭鬪之訟爾其摘發姦伏裁剗劇煩使桴鼓設而稀鳴囹圄空而不犯首善之地為萬邦之聳瞻奏最之優致三輔之取法是為稱職則予汝嘉

工部尚書除延康殿學士知青州兼安撫使

中臺率屬參華八座之崇外屏分符宣風千里之遠出

處雖異倚任惟均眷予心膺之臣徃奠股肱之郡宜推
異數式寵其行具官某敦大裕和高明閎遠學洞古今
之蘊智周事物之幾頃被東求徧歷華近居言語侍從
之列有獻納論思之忠擢長冬官茂著風績休有譽處
恬然靖共遽陳均逸之章祈遂偃藩之志顧東土之都
會賓海嶽之輿區民物阜蕃風俗渾厚慎擇厥守式圖
爾居兼祕殿之華資付全齊之重寄承流宣化聿資師
帥之良報政第功佇聞課績之最徃攄素蘊無煩訓辭

戶部侍郎除顯謨閣直學士知揚州兼淮南東路

鈴轄

曳裾持橐入聯侍從之班紆組分符出總蕃宣之寄中外雖異倚任惟均眷予心膺之臣徃殿股肱之郡宜推寵數式迨其行具官某識度粹夷風猷敏飭學博而守之以約材全而用無不宜頃被明揚薦躋華要代言鳳閣有獻納論思之忠貳政版曹得闔闕斂散之術有懷均逸力丐偃藩眷淮海之奧區實東南之都會慎擇厥

守式圖爾居陞峻職於西清總重兵於一路承流宣化
聿資師帥之良報政奏功佇聞課績之最徃服朕命惟
既厥心

中書舍人除徽猷閣待制知廬州

入持從橐出剖郡章雖中外之或殊顧眷禮之無間式
頒異數以寵其行具官某識度粹夷文辭敏妙頃由東
拔寢歷清華處言語侍從之班有獻納論思之益抗章
請外願試牧民其次對於西清以分符於南服承流宣

化往慎撫綏奏最第功佇觀報效勉思予訓益旣乃心
殿中監

王者極崇高而臨寶位作威福而享玉食備萬物之奉
極天下之養必有法式掌于有司故周建六卿列於天
官之屬唐分六尚綜以殿中之官肆朕纂承若稽古訓
崇其班秩以示褒優必惟其人乃稱茲選以爾具官某
器度凝遠才識敏明席世胄之高華蔚搢紳之譽望踐
歷滋久績效可觀敬自朕心擢司盾省凡乘輿服御膳

羞酒醴次舍器用典于六局者咸總治之爾其慎率乃僚各共爾事夙夜匪懈事予一人尚有寵褒以為汝勸

太常卿

列寺置卿奉常尤為高選凡祠祭禮文之事悉總治之職要地清非他司比充是選者實難其人具官某資識敏明器度凝遠博雅好古直諒多聞中外踐更靖共自好蔚有譽望藹于搢紳蔽自朕心擢長寺事朕方觀會通以行典禮罄齊潔以事神永資爾欽承副于明恤贊

相禮儀之事討論郊廟之文往率乃僚各修厥職以稱朕所以命爾之意

宗正卿

朕纂紹丕圖敦睦九族以屬籍辨其世系以學校興其賢能職在宗正厥任重矣膺是選者實難其人具官某資識敏明趣操端亮雅有譽望藹于搢紳為郎省曹靖共有守擢貳卿寺風績著聞蔽自朕心進長寺事夫職清事簡而兼師儒之選亦汝之所欲也往既厥心務推

朕所以教養之意使人自勸學底于有成則為稱職尚有寵褒

明堂頒政

帝者之世天道致祥堯歷象以授時舜璣衡以齊政萬
邦作乂庶績咸凝朕纂紹丕圖稽古有作建合臺以觀
象御時堂以頒常庶幾與帝者同風必惟其人克任斯
職具官某性資端厚器度閎深學足以通古今之淵源
識足以窺天人之精祲徊翔卿寺聞望彌休頒政之官

肆以命汝夫提挈天地把握陰陽以御六氣之辨此固
出於精神心術之妙至於推而行之無或爽忒俾四方
萬里之遠遵承而弗違此則汝之職也往既乃心圖稱
朕命

秘書監

朕藏天下之圖書以待討論之用聚天下之英俊以備
校讐之官總治監事非清德老儒孰任茲選具官某博
雅好古直諒多聞文足以為國華材足以周世務蚤被

識拔寢歷清華恬然靖共休有譽處蔽自朕志擢長芸
臺夫左圖右書而朝夕所與共處者皆英俊之游亦汝
之所樂也徃究乃心以稱朕所以命汝之意

太僕卿

國容莫重於奉車軍政必先于牧馬太僕之職車馬是
司驂乘與以周旋掌閑廐之政令厥任尤重匪材不居
具官某資識詳明風猷敏効踐揚滋久譽聞甚休蔽自
朕心擢長寺事徃率乃屬其既厥心正于僕御之臣罔

非吉士辨夫毛物之等使之阜蕃則予汝嘉是惟稱職
光祿卿

漢置光祿勳以班爵詔功而後世列于諸卿實掌膳羞
酒醴之政肇修官制因而不改克稱厥職必惟其人具
官某學問該明趨操端亮雅有譽望藹于搢紳為郎省
曹靖共有守擢貳卿列風績著聞蔽自朕心進長寺事
夫膳羞酒醴所以供上帝百神之祀待賓客百官饗殮
之奉厥任重矣往盡乃心茲率厥常以副朕所以命汝

之意

太府卿

周建九府而太府之職掌貢賦之貳受其貨賄之人而
以式法頒之稽古置卿委任甚重克稱厥職必惟其人
具官某資識敏明器度宏博更踐外中風績著聞蔽自
朕心擢總寺事夫財用之所出納物夥事叢則姦弊易
乘以起往盡乃心必謹察而明辨之以稱朕命汝之意

司農卿

國家轉漕東南以給中都周知其數職在大農非材力敏強克辦大計曷任茲選具官某學問該洽智術自將為郎省曹休有譽處奉使外服風績流聞蔽自朕心擢總寺事夫出納斂散雖有常式均調盈虛亦惟其人往既乃心以裕邦計使倉廩充實而賦必以時則為稱職尚有寵褒

大理卿

廷尉天下之平也邦憲是司民命所寄厥任甚重必惟

其人具官某起自法家克著顯譽有明敏之才足以折獄有審克之智足以決疑蔽自朕志命爾作士夫昔之所是疏為律今之所是著為令訊鞠論報掠治傳爰憲章具存資爾推舉惟察惟法必慎必清體朕好生期於弼教昔張釋之為廷尉而天下無冤民于定國為廷尉而民自以不冤往既乃心無俾專美則朕以懌爾亦有辭

鴻臚卿

朕正朝儀以湊羣辟厚賓禮以懷遠人職在鴻臚掌其政令厥任甚重匪材不居具官某資識敏明問學該洽揚歷滋久譽望彌休蔽自朕心擢長寺事夫四方之賓客與異域之蠻夷貢覲以時道里脩遠宜厚綏懷之意以旌來享之誠往率乃僚無替朕命

都水使者

王者體國之制水政為先邦計賴轉輸之功民事資漑溉之利固隄防以虞決溢濬畎澮以底䟽通政令具存

水衡是職厥任甚重匪材不居具官某資識詳明風猷敏効踐歷滋久譽望彌休蔽自朕心擢總監事流觀物理水不異於趨卑遠纘禹功智必行於勿鑿徃率乃屬明聽朕言佇觀厥成嗣有褒寵

軍器監

王者除戎器以戒不虞甲冑干櫓捍患以完固為先弓矢戈矛討敵以犀利為貴藏在武庫有司時出而繕修之總是職者實難其人具官某資識強明材術膚敏更

踐中外風績著聞蔽自朕心擢總監事夫材有美工有巧而器械之制咸有法式具存憲章往修厥官以稱朕所以命爾之意

少府監

少府置監典治尚方備物制器以供御宸極厥任甚重匪材不居具官某資識詳明風猷敏劭雅有譽聞藹於搢紳蔽自朕心擢總監事夫漢宣總核名實而百工技巧咸精其能朕甚嘉之往既乃心物勒工名必考其成

以副朕所以命爾之意

將作監

王者體國凡宮室門闥高下廣狹之制皆有法式掌於有司大匠之職實總營造厥任甚重必惟其人具官某資識詳明材術膚敏揚歷寢久風績著聞蔽自朕心擢總監事夫國有六職百工居一焉審曲面執巧者述之往若予工使盡其巧而依於法是為稱職嗣有寵褒

梁谿集卷三十八

欽定四庫全書

梁谿集卷三十九

宋 李綱 撰

表劄奏議一

辭免監察御史兼殿中侍御史奏狀

比部員外郎輪對劄子五

理財以義劄子

用人材以激士風劄子

論官制財用不能悉視熙豐劄子

乞徽廟解易劄子

乞編寬恤手詔劄子

辭免監察御史兼殿中侍御史奏狀

右臣今月十一日準閣門告報已降告命除臣監察御史兼權殿中侍御史者聞命震驚罔知所措竊殿中侍御史實為天子耳目之官朝廷政事與夫百官之邪正皆得風聞而上言厥任重矣自非明習世務而有剛果不畏強禦之材未易稱此如臣者學述迂踈智能淺薄

昨自學官召對大廷擢真郎省已為過分今茲又蒙誤
恩使備臺屬同除五人獨臣兼任風憲自視缺然何以
仰副陛下明日達聰之意伏望聖慈察臣區區收還成
命以允公議

比部員外郎輪對劄子五

理財以義劄子

臣伏見朝廷講求理財之術以足邦計議者紛然爭獻
其說夫以天下之大承平之久萬物盛多之時經畫財

用豈患不足貴於理之有其義而已易曰何以聚人曰
財理財正辭禁民為非曰義財者民之所以相生養者
也故人非財無以聚之義者利之本也故財非義無以
理之溥天之下莫非王土率土之濱莫非王臣臨之以
法度之威何求不獲而先王必以輕賦薄歛為貴者
蓋知予之為取者政之寶也方今國家用度之廣官
吏廩祿之多倍蓰於前則講求理財之術誠為先務
獻議者亦不容無取然臣願陛下必令廟堂之臣參

議以聞蔽自淵衷揆之以義而行之使義然後取人不
厭其取上以裕國下以裕民實宗社無窮之利也取進
止

用人材以激士風劄子

臣聞人主所以共治天下者莫先於人材所以激勵天
下者莫先於士風人材貴於衆多故濟濟多士文王以
之寧士風貴於淳厚故古者長民從容有常則民德以
之歸厚二者天下之大本不可不察也陛下廣學校以

作成之班爵祿以官使之天下之士雲蒸而霧集人材可謂衆多矣至於士風猶有可議者在於朝廷有以勸沮之而已狃於私枉而務虛偽此士風所以未厚也欲士無虛偽之行莫若獎衷實以先之志於表襮而尚浮華此士風所以未厚也欲士無浮華之習莫若舉惇朴以鎮之急於進取而事奔競此士風所以未厚也欲士無奔競之躁莫若崇靜退而率之夫衷實惇朴靜退之士非內有所養而見善明用心剛者不能也內有所養

而見善明用心剛者以類而進則立朝必有可觀者臨
利害必有不可奪者又豈循情於流俗之間為哉臣愚
伏望聖慈親灑宸翰詔二三大臣進用人材必以激勵
士風為先務獎衷實而察虛偽舉惇朴而黜浮華崇靜
退而抑奔競則士風厚而天下之俗舉歸於忠厚之域
矣此宗社無窮之計也取進止

論官制財用不能悉視熙豐創子

臣伏覩陛下近降詔旨不係元豐官制事目增置官局

等令大臣取索條畫措置以聞此有以見陛下深惟政
本而有裁省官局之意也又詔內外官司立旁通格目
令各修具元豐紹聖崇寧政和年分財用之所出入見
在侵支實數以聞此有以見陛下深惟邦計而有均節
財用之意也恭惟陛下躬聰明睿智之資撫承平熙洽
之運繼神考之志述神考之事其所施設而已然者遵
制揚功而率由之其所有意而未備者增光潤色而推
廣之建立制作法度禮樂凡百王之所不敢睥睨者悉

舉而行之以大有為於當世然則增置官局不得不多
支費財用不得不廣實理之所當然也今紹述之道罔
不完具政立而法度已彰矣教行而禮樂已著矣陛下
儲神穆清宅心昭曠日隆於清靜無為之化則去其華
而實之猶彼春夏飲為秋冬而歲功成省官局之冗員
以嚴政本節財用之浮費以裕邦計亦理之所當然者
是宜深軫淵衷命廟堂之臣議此以為先務也然臣竊
謂一而不易者道也徙而不留者時也有天下者執道

以御衆必有以體其常治天下者應時而造法必有以通其變陛下紹述神考之道措之德業固將傳之無窮施之罔極以垂訓於萬世至於以熙豐之時而視今日則生齒之衆多事為之叢鉅豈特相倍蓰而已哉然則裁省均節固不能悉視於熙豐盍亦揆之以道度之以時損益盈虛惟義之適立為中制使無太過不及之患則實有在於今日之舉臣愚伏望聖慈親詔二三大臣審圖之熟慮之可否相濟於未熟之前號令必行於已

出之後斟酌調制適於厥中官局之可省者省之必務
合於人心財用之可節者節之使無損於國體以道為
公惟義理之為從成一代之宏規以昭陛下建用皇極
之道天下不勝幸甚取進止

乞徽廟解易劄子

臣伏觀朝廷崇經以造士詩書周官自我神考命儒臣
以訓釋之學士大夫有所取正而不怵於異說非小補
也惟易之為書範圍天地幽贊神明極深研幾廣大悉

備而獨汨於傳注諸家之說訓而釋之曷可少哉然而
易更三聖伏羲畫其卦文王繫其辭孔子為之彖象又
為之大傳說卦序卦雜卦等篇以發明其道故易於羣
經尤備聖人述作之旨非特若詩書周官載先王應世
之跡而已羣經出於秦火之餘類多缺文而易幸託於
卜筮獨得為完書自漢以來奇辭奧旨闡而不彰鬱而
不發則推而明之發揮精義以承三聖之述作以折衆
言之淆亂非聖人之獨智其孰能當之道不虛行理若

有待恭惟陛下天縱睿智輔之以緝熙光明之學體元
用妙該極象數萬幾之暇訓釋老莊之書以開悟天下
之學者辭旨高妙足以發難言之意而道德性命之理
燦如也夫易無思也無為也寂然不動感而遂通天下
之故實與老莊之書相為終始臣愚伏望聖慈斷自淵
衷為之訓釋以通神明之德以發乾坤之蘊使聖人之
全經彰明較著學者得法象焉實萬世無疆之休取進
止

乞編寬恤手詔劄子

臣恭惟宋受天命藝祖勦業其得天下也以仁得之列
聖守成其守天下也以仁守之重熙累洽百有五十餘
載承平之久跨漢軼唐雖堯舜三代之隆無以過也陛
下光紹丕圖祇邁先烈宵衣旰食勵精為治立政造事
所以利安元元者無所不至而一以仁慈為之本可謂
深得祖宗勦業守成之道矣爰自臨御以來屢下寬恤
之詔宸翰昭回至誠惻怛之意見於辭者足以鼓天下

之動是以薄海內外蒙被德澤天覆地載海涵春育無
一物不得其所協氣嘉生薰為太平以仁致治其效如
此臣愚竊謂詔令之所布實賴官吏悉意推行不為文
具則實德之及民者彌久而彌廣然詔令之頒降有先
後而官吏之去來為不常雖德意志慮具在方冊後來
者徃徃未嘗深究而周知之朝廷之上所當以時舉而
行之者也陛下過者幸以紹述熙豐政事頒於朝堂矣
願詔有司檢會裒集前後所降御筆寬恤手詔事件如

勸農桑恤刑獄戒搔擾賑貧乏恤鰥寡孤獨之類通行於天下而非一時指揮附於紹述熙豐政事之後以時頒之申命以告四方庶幾內外官吏深惟德意志慮之所在竭力遵奉罔敢怠廢以副陛下以慈為寶仁民愛物之意天下幸甚取進止

梁谿集卷三十九

欽定四庫全書

梁谿集卷四十

宋 李綱 撰

表劄奏議二

辭免除起居郎奏狀

赴講筵侍立後時待罪奏狀

謝放罪表

論水災事乞對奏狀

論水便宜六事奏狀
論水事待罪奏狀

謝謫監沙縣稅務到任謝表

謝復官表

謝知秀州表

辭免除起居郎奏狀

右臣今月十八日準閣門告報已降告命除臣起居郎
日下供職不許辭免者聞命震驚罔知所措竊以左右
置史曰侍清光以書言動接武侍從號為高華宜得天
下英俊極一時之妙選以副公議如臣不材何以稱此
雖奉宸翰不敢稽留黽勉就職退量謏薄據非其所終
不自安伏望聖慈察其忱誠收還誤恩以安愚分所有

告命未敢祇受

赴講筵侍立後時待罪奏狀

右臣今月十四日垂拱殿起居訖赴延和殿侍立退詣
崇政殿門外計會講讀官同赴邇英閣講筵是時講讀
官已先入遂致趨赴侍立後時臣不勝惶懼待罪之至
伏望聖慈特賜黜責施行

謝放罪表

臣某言今月二十一日延和殿侍立退赴邇英閣講筵

後時具奏待罪伏奉御筆放罪仍封還奏狀者黼座臨
軒幸侍龍犀之表經筵勸講獨稽鵷鷺之班剡章方俟
於嚴誅灑翰遽從於寬宥驚慙有覩感涕無從中謝伏
念臣智不逮人材非適用驟從疎遠躡取清華靜言遭
遇之因皆出聖神之造屬便朝之聽治叨載筆以記言
以草茅之資奉威顏於咫尺以口耳之學聞訓誥之淵
微方藐藐以震驚宜規規而失措臚傳放仗爰就列以
言旋正席橫經遂愆期於放進考情實雖由於過誤嚴

分守宜抵於譴訶輒陳自効之章願正慢朝之罪伏蒙
皇帝陛下以乾坤之大度軫父母之至慈察臣趣造之
心非敢後也憫臣委蛇之跡如或使之亟推宥過之私
遂置黜幽之典特頒奎畫仍却囊封禹致羣臣之朝甘
從後至之戮湯去三面之網舉知善貸之仁丘山之賜
不貲螻蟻之誠何報仰酬覆燾誓極靡捐

論水災事乞對奏狀

右臣伏覩陛下以積水暴集滄浸民居迫近都城累降

御筆分遣官吏固護隄防拯濟漂溺仰見陛下聖慮焦勞曲盡防患之理然臣竊謂國家都汴百有六十餘載未嘗少有變故今事起倉卒遠邇驚懼誠大異也臣嘗躬詣郊外竊見積水之來自都城以西漫為巨浸東距汴堤停蓄深廣湍悍峻激東南而流其勢未艾以宗廟社稷之靈雉堞防守之固萬無他慮然或淹緩旬時因有風雨有不可不慮者此誠陛下寅威天戒博詢衆謀之時而羣臣竭智効力捐軀報國之秋也累日以來傾耳

以聽缺然未聞臣竊怪之夫變異不虛發必有感召之
因災害未易禦必有消弭之策周官於國危則有大詢
之禮祖宗每遇災變亦降詔求言臣愚伏望陛下斷自
淵衷特詔在廷之臣各具所見以聞擇其可採者非時
賜對特加驅策施行其說因衆智協衆力濟危圖安上
以答天地之戒下以慰億兆之心天下不勝幸甚臣仰
荷陛下天地父母之恩親加識擢得侍清光常思奮不
顧身以循國家之急輒有已見急切利害事須面奏伏

望聖慈降旨閣門許臣來日因侍立次直前奏事庶幾得盡狂瞽仰裨聖慮之萬一伏候勅旨

論水便宜六事奏狀

右臣近嘗奏請以水潦為患乞賜燕間敷陳利害今月十四日崇政殿侍立閣門傳旨令臣先退惶懼戰慄居家待罪不敢供職聖恩寬厚未奉誅責日夕惴恐跼蹐無他伏念臣愚忝謏聞孤立寡與惟知仰事陛下以國家為心比見積水暴集逼邇都城私憂過計輒貢狂瞽

情迫意切言皆不倫觸盛意犯隆旨自干雷霆之威死
有餘罪自非陛下恕其愚直天地父母矜而憐之誰復
為臣言者臣竊以水旱之災雖堯湯有所不免惟聖人
為能遇災而懼側身修行博詢衆謀以銷去之故堯於
洪水方割之時有疇咨之言湯於旱既太甚之日有六
事之責皆能轉災以為福易沴以為和此古聖人之明
驗也今者水患之來起於倉卒人心惶懼遠邇震驚幸
賴宗社之靈陛下睿筭之審屢降御筆處分䟽導通決

勢漸退落雖畿甸旁近皆罹其災而都城無虞人意漸定然臣竊以謂水災既退之後朝廷未可以謂無事正宜講究利害增固隄防寅念天戒益以修省不可忽也臣愚蠢不揆輒妄發昧死上便宜六條一曰治其原二曰折其勢三曰固河防四曰恤民隱五曰省煩費六曰廣儲蓄惟陛下留神幸察臣恭惟國家卜世定鼎眷都大梁平原沃野彌望千里非有高山峻嶺為之阻而都城以西京索交流陂澤相接自西徂東地勢傾下加以

雨潦不能吞納則決溢東注俯灌都城其勢然也為今
之計莫若相視陂塘疏導京索增卑培薄固以隄防節
以斗門旱則水有所泄雖霖雨其勢不得接連而下可
以為萬世之利此則治其源之策也臣竊觀自昔善捍
水患者必為長隄以濟其衝其意以謂以數仞之城而
拒方至之水風濤之所鼓薄亦已危矣限以長隄殺其
怒勢然後人力可施而城益堅今積水之來自都城之
西浩如江湖東抵汴岸南阻新堤雖停蓄深廣而卒不

能至城下者有隄以為之阻也由隄而行散漫湍激至
都城之南則徑抵護龍河者無隄以為之阻也為今之
計莫若距城數里之外因高地勢繚以長隄使雖有積
水決溢之患循隄四瀉不能薄城可以禦一時之急此
則折其勢之策也國家都汴處大河之下流其所恃以
為固者掃岸堅而法制嚴也比年以來玩習苟簡護衛
之卒散於抽差備禦之儲耗於轉易河齒隄防日朘月
削恬不加恤如廣武掃其距清汴纔百餘步去冬危殆

屢矣其不決溢者特幸耳使夏秋之交乘霖雨湍暴之勢果能保其無虞乎夫以陂澤積水暴集之患猶可驚駭况大河之勢又可不為之深慮哉臣愚願擇深知河事者相地形回清汴使與大河相遠仍詔有司遵守法制存留兵革儲積材料敢有抽差轉易者必處以刑此則固河防之策也今茲積水之來衝白沙蕩中牟迫都城散漫畿甸之邑淹浸屋廬漂溺民畜損傷苗稼不可以數計今又決其南以注於陳蔡之郊決其北以注於

相衛之境疏汴渠之下流於陳留則數千里之內悉被其患矣陛下惻怛憂勞降詔拯濟德意甚厚臣猶竊慮州縣監司未能悉意奉行也願詔諸路應被災傷地分今年秋租並與蠲免水過之後安集民居借貸賑濟務令復業無使失所以副陛下之意此則恤民隱之策也臣竊惟去歲江淮泛溢東南之民悉皆流移賴陛下聖慈以六路上供米斛廣加賑濟民得無死德至渥也然州縣蕭條帑廩匱乏迄今未復今畿甸旁近又有積水

之患矣何以堪之臣愚願陛下斷自宸衷凡營繕工役
花石綱運有可省者權令減罷數年之間民力漸完國
用以足然後惟陛下之所命耳裕民豐財莫是為大臣
所謂罷不急之務者此也臣又惟古者九年必有三年
之蓄二十七年必有九年之蓄然後無旱乾水溢之患
教化行習俗美而頌聲興是為太平治之至也祖宗以
來舊有封樁米斛以千萬計所以為兵民之天宗社之
本也比年來工役寢多仰食者衆歲以侵耗遂致殫竭

今國計所仰者獨東南六路轉輸歲額耳假使一方水旱歲額不登將胡以自給靜以思之可為寒心臣愚願陛下明詔有司裁蠶食者幸歲豐登朝廷多降糧本委彊幹官吏廣行收糴別項上供以充封樁之數歲歲如此及祖宗舊額而後止此朝廷之所優為何不留意而獨為懍懍也養兵足國莫是為急臣所謂廣國之儲者此也凡此六者皆當今之要務顧臣智識淺陋文字荒疎言不足以達意惟陛下財幸下臣章宰執議其可否

如可採錄望賜施行臣比者嘗獻愚計伏蒙聖慈寬假未賜斧鉞之誅輒復自竭冒昧天聽庶幾芻蕘之言有補萬一仰報盛德

貼黃一

臣伏以水患暴至失於隄防憑陵都城久未退息厥異甚大誠不可忽伏望陛下畏天戒固民心收士用嚴守衛以彌寧災害大慰天下之望避殿減膳告於天地宗廟社稷所以畏天戒也法禹湯之罪己以詔萬方親御

六龍率羣臣負土石以先士卒所以固民心也誅水官之不勝任者以正典刑擇材智而驅策之與共患難所以收士用也輟營繕花石之不急者併卒伍而部分之以備不虞所以嚴守衛也四者既具又在陛下修胷中之誠感動天心如此而災害不彌和氣不臻未聞之也臣不勝惓惓盡死節惟陛下裁察

貼黃二

臣區區之誠以謂暴水之災理不虛發在廷之臣瘖默

取容無肯奏知陛下以克謹天地告戒之意者不勝憤
懣嘗罄狂愚冒瀆聖聰今又不能自己輒復妄發伏望
陛下察臣之意少賜寬假無使忠義之士鉗口結舌視
臣為戒天下不勝幸甚

論水事待罪奏狀

右臣今月十二日曾具奏以暴水為災迫浸都城恐非
細故欲望陛下寅念天戒招徠讜言仍有已見急切利害
乞因侍立直前奏事今月十三日崇政殿侍立宰執退

傳旨閣門令臣先退更不待立臣不勝惶懼戰越之至
見今居家待罪不敢供職伏望聖慈特賜黜責施行

謫監沙縣稅務到任謝表

臣某言昨任承事郎試起居郎兼國史編修官論都外
積水不當準告授承務郎差監南劍州沙縣稅務已到
任訖囊封奏御仰冒雷霆之威宸筆正刑尚寬斧鉞之
戮罪深謫薄感極涕零中謝臣聞明目達聰者君之經
陳善責難者臣之義惟君聖而臣直則道交而志通故

雖帝王極治之時必有骨鯁敢言之士臣獨何者竊慕
其風以疵賤樸鄙之資玷清切高華之選儻遇事而懷
祿實處朝而覲顏一時隄防失虞水潦暴集方詔令之
旁午見睿知之焦勞而臣仰荷眷知每懷補報思慮倉
卒雖徇國而忘身學識迂踈誠私憂而過計念戇愚之
妄發知罪戾之難逃一再褫官蒼黃去國螭坳載筆夢
想雲龍之遊劔浦征商分甘筦庫之後夫何孤陋亦荷
保全此益伏遇皇帝陛下天度兼容至明旁燭憐臣狂

獨自取顛躋察臣精誠本非沽激特屈憲章之峻俾霑廩食之優臣敢不銘佩隆恩誓堅素守忠孝難並立徒深將父之懷節義為大閑益勵愛君之志

謝復官表

臣某言臣昨任承事郎試起居郎兼國史編脩官論積水不當降授承務郎監南劍州沙縣稅務今月二十二日準告叙復承事郎差遣如故已望闕謝恩祇受訖海隅遠屏方履薄而臨深帝澤霽流爰赦過而宥罪致茲

孤陋亦荷甄收拜賜惟優撫躬增厲中謝伏念臣奮身
寒苦構時隆昌惟造道之弗優致信古之太過誤蒙識
擢躡處高華蘭省為郎薦膺器使霜臺舉職親被褒稱
奉常贊郊廟之儀左史珥螭坳之筆叨逾若此報稱謂
何自以立有道之朝輒敢效危言之計雖思慮倉卒腸
實無他然蹤跡飄零孽乃自作姑從薄謫已荷寬恩豈
期謫宦之鄉忽拜復官之命負罪至重雖未削於丹書
歷歲纔周已悉還於舊秩省循既往銘刻何言此蓋伏

遇皇帝陛下體天德而出寧執古道以御有念一夫之失職仁聖所矜施三赦以恤刑蠢愚為最俯憐孤跡曾侍清光還其寄祿之階示以滌瑕之漸荷恩益腴矢死為輕再念臣一去彤墀屢經霈澤親年踰於七十喜懼之懷交深庭闈遠者三千甘旨之奉久闕方聖主隆孝治以善俗獨孤臣嬰罪戾而向隅興言及茲追咎靡及非天地父母之德哀而憐之則犬馬螻蟻之誠誰復言者願垂日月無私之照獲伸烏鳥欲養之心則臣失東

隅而收桑榆捐軀未晚先朝露而填溝壑結草為期

謝知秀州表

宣和六年內除知秀州七年三月召除太常少卿此表不曾上

珥筆記言久違於螭殿分符共理溫守於海邦初見吏

民具宣德澤中謝伏念臣迂愚有素

一云區區有志

結約

一云碌碌

亡竒徒竊慕於古人曾弗通於世務親蒙識擢躡處高

華不能慎默以保身乃以狂狷而速戾一從斥逐七改星

霜侍黼座之清光徒勞夢想躬米鹽之俗務彌自省循

迨奉寬恩遽罹艱棘終寢苦之制僅不泯於餘生有負

薪之憂未自歸於銓部寧期甄錄謬及孱庸假以紱章
之榮付之民社之重惟嘉禾之小壘當浙江之要衝水
旱相仍流移方甚牧養實資於愷悌推行宜遠於變通
豈容拙疎輒此叨據此蓋伏遇皇帝陛下堯仁天覆湯
聖日躋用人惟已而益其前愆以道觀能而收其後效
起從謫籍俾守藩條臣敢不仰體眷慈俯矜凋瘵雖抑
强扶弱初無一日之長而宣政承流願奏三年之最

梁谿集卷四十

欽定四庫全書

集部

梁谿集卷四十三

詳校官庶吉士臣張溥

侍讀臣孫球覆勘

總校官知縣臣楊懋珩

校對官編修臣王天祿

謄錄監生臣陶紹侃

欽定四庫全書

梁谿集卷四十一

宋 李綱 撰

表劄奏議三

上道君太上皇帝封事

召赴文字庫祗候引對劄子

上道君太上皇帝封事

宣和七年十二月詔求直言時任太常少卿上封事

十二月二十一日宣敎郎試太常少卿臣李綱謹昧死再拜上封事皇帝陛下臣聞忠臣不避誅以正諫故能

濟患難而圖安明主不以人而廢言故能協智力以自
助臣愚忘生觸死願效區區之忠惟陛下留神幸察臣
近以太常職事贊導郊禋竊見陛下裸獻太廟十室聖
心感動涕泗橫流侍祠之臣仰助惻楚然臣以謂陛下
念祖宗艱難之功必思所以持盈守成慕神考勛勞之
德必思所以繼志述事況於宗社之大本生民之大計
得不深慮而熟察乎臣伏觀陛下自臨御以來追紹先
烈所以持盈守成繼志述事者無所不至遠欲據祖宗

之宿憤近欲成神考之貽謀因契丹之衰亡復燕山之
故境此誠不世之功甚盛之舉也然而謀事之臣動失
機會統兵之將多違指蹤糧餉有飛輓之勞賂遺有貪
婪之患金國敗盟羽書狎至常勝失守存亡未期自燕
地以南無高山深林險阻以為捍蔽自大河以北有頻
年盜賊郡縣為之蕭然設使虎狼之衆蝟結蟻聚侵邊
徼而摩封疆將何以禦之此誠宗社危急之秋陛下側
席求言而忠臣義士奮不顧身以報國家之日也竊聞

有旨召侍從之臣聚議各具所見以聞有以見陛下焦勞慨然有納用羣策之意臣以庶僚疎賤不獲與議論之末竊自傷悼久抱孤忠考古揆今參之天人之際日夜念此至熟仰荷陛下知遇寧忍緘默不言以圖補萬分之一敢忘越職犯分之罪冒進忱辭惟陛下赦其狂瞽而詳擇其中臣竊謂當今禦戎之急務雖在於選將勵兵多方捍敵然要須知其本原敵乃可制杜牧所謂上策莫如自治而以浪戰為下策者誠為知言前者已

不可悔後者猶可圖也臣謂治其本原者其說有五
一曰正己以收人心二曰聽言以收士用三曰蓄財穀以
足軍儲四曰審號令以尊國勢五曰施惠澤以彌民怨
臣所謂正己以收人心者比年以來搬運花石舳舻相
銜營繕宮室斧斤不輟製造器用務極奢巧賜予之費
靡有紀極燕遊之娛倍於曩時此皆上累大德下失羣
心蠹耗邦財斬刈民力積以歲時馴致今日之患非偶
然也孔子曰一日克己復禮天下歸仁焉又曰修己以

安百姓堯舜其猶病諸凡此數事特皆陛下耳目玩好
嬉戲之具於事為甚輕然而實害天下之大計於體為
至重斥而罷之一念之頃斷自聖心夫復何難此令朝
行人心夕改所謂克己復禮而天下歸仁修己安人而
比隆堯舜者陛下豈不優為之臣願陛下降明詔罷花
石之運停營繕之工減製造之局省賜予之費節燕遊
之娛凡應奉之物一切禁絕如已詔停罷前項數事更
願以至誠惻怛之意加之深省前失無以事勢稍緩即

復施行要在使衆必信上以昭聖德下以收人心可乎
臣所謂聽言以收士用者比年以來忌諱衆多人材鮮
少諂諛之說日進忠慤之言不聞譬猶一人之身衆病
交攻不求瞑眩之藥而望厥疾之瘳不可得也夫中材
之士正須崇獎乃敢展盡况復摧抑誰復納忠是以大
臣以將順為任職而不肯諫小臣以畏縮為得計而不
敢言侍從之列懷榮寵而謀身臺諫之臣舉細故以塞
責習熟見聞致今日之患亦非偶然也書曰后從諫則

聖傳曰武王諤諤以昌以陛下之明而招徠羣言廣諫益聖天下之事有不足為者况彼區區之國何足深畏孟子曰聞以七十里而有天下未聞以千里而畏人者也况以天下之大而畏小醜哉方今賢士大夫或伏於下僚或遊於山澤以陛下無至誠聽用之意皆閉其言而弗出平日陛下所取謀而聽用者不過左右近習之臣陛下以今日之事思之果能有濟乎臣願陛下降明詔求忠讜之言延草茅之士許侍從同薦或自薦達便

殿賜對不拘以時使之展盡底蘊虛心以聽之言而是
舉行其策而隨加擢用言而非加慰勞而勿復譴責仍
於詔中明著悼往年求言加罪之失凡百忌諱一切蠲
除上以廣聖聰下以收士用可乎臣所謂蓄財穀以足
軍儲者臣聞人以財而聚兵以食為天雖有良將銳卒
非財莫能使也雖有金城湯池非穀莫能守也財穀之
蓄平日者猶不可緩況於用兵禦敵為持久之計哉比
年以來用度無節侵耗日多財匱而府庫虛穀散而倉

廩竭物力既耗人心驚疑如居風濤洶洶靡定今日所以給軍費不知陛下於何所取而足乎取之內帑而內帑有盡取之封樁而封樁已無取之闔閭歛散之術而權貨之法已殫取之橫賦暴斂之政而吾民之力已困正當苦節以為足用之計耳近者置司講議失本末先後之序凡所裁減類皆毛舉僅及百分之一二而真所謂無名之費不急之務初未嘗裁減也況於權臣貴戚近幸之臣開端援例以沮壞之有裁減之名無裁減之實

怨謗紛然何補於事今日之勢迫矣屯兵數十萬糧餉
錫賚其費不貲又將取於吾民如前日之免夫錢則四
方盜賊圍視而起豈不趣禍亂哉臣願陛下深思熟計
如臣前之所陳既罷花石營繕製造賜予燕遊應奉等
事明詔有司將常日逐項錢物盡歸版曹別項椿管專
給軍費御前不復取索有司不進關子有不如詔重寘
於法又詔宰執文武百官俸給米麥減半宰執及觀察
使待制以上官在京有物業者仍令各進家財以助國

用事平旋行給還在京上戶願進者聽優與官職又詔
諸路漕臣以上供斛斛及自御前撥降錢帛日下於淮
浙汧流州軍高價糴穀多方措置人船星夜起發以實
中都斷而行之勿為浮議所沮財穀充牣軍儲有餘則
外患不難禦也臣所謂審號令以尊國勢者臣聞人主
深居九重之中所以宰制萬邦役使羣心者莫大於號
令號令者國之紀綱也其在天如風雷在人如血脉風
雷不失其序則萬化成血脉不悖其理則四肢運故人

主之於號令必審諦而不妄發則威信立而國勢尊下
之仰上如天惟其所命民之視君如心惟其所使此帝
王御天下之常道也比年以來發號出令初莫之審朝
令夕改初不必行密降旁出而三省密院不與知東以
峻法而給舍不敢駁夫元豐釐正三省密院之制皆所
以奉行天子之號令也二三大臣與夫給舍之官皆陛
下親擇而信任之者也號令之出而二三大臣或不與
議號令之行而給舍之官不得舉職是朝廷為虛設而

政事之出所以多門也首尾衡決先後錯忤有司疑於趨赴四方無所適從陛下方以摠攬權綱為得計而不知國勢已卑矣臣願陛下深究神考設官之意每下號令必與二三大臣謀之無使非其人者得與其或未允聽給舍得以審駁令出惟行而無反汗之譏信賞必罰減去私意則州縣將吏兵民如身之使臂臂之使指外患不難禦也臣所謂施惠澤以彌民怨者臣聞民之恃財以生猶魚之恃水以活也王者之澤被於民深譬之

江湖散漫悠遠魚於此而相忘豈有他哉用之有節取
之有道不奪其所以相生養者而已比年以來用度既
廣取於民者常賦之外其目繁多絮帛則有和買預買
有泛買有常平和買有應副燕山和買米穀則有和糴
有均糴有補發上供和糴有應副軍糧和糴有撥發輦
運司和糴名曰預買無錢可敷名曰和糴其價每下又
以官告度牒鈔書准折衆戶共分皆為虛名無用之物
此外又有茶鹽敷配課額贓吏猾胥因緣侵漁一家之

產隨其高下所出如此欲其不飢寒轉徙得乎東南之民耳目見聞水漕而陸輦者又皆花石應奉不急之物愚民無知以謂奪其父子兄弟夫婦所以相生養之具盡於錙銖而用之如泥沙以供浮費欲其不興怨謗何可得哉是以頃歲江浙巨盜一呼從之者颶舉而雲集東北嘯聚至今為梗職此之由方今邊鄙震聳人心驚疑深慮窮民復起為盜則腹背受患何以支吾臣願陛下明詔州縣凡積歲欠負並與放免近降措置財利指

揮如鈔旁錢免行錢醋息錢之類一切停罷庶使民心
安妥而姦猾不得以搖之此不可緩之策也臣前所陳
五事如蒙陛下詳察而施行之則所謂上策莫如自治
者其大槩已舉矣變危為安莫先於此至於選將勵兵
多方捍敵之策臣請試為陛下陳其梗槩捍敵之策其
說有十遣大臣之有智謀權略素為天下之所信服者
為大帥盡統諸將聽其節度推轂授師不從中制使兵
勢不分一也選諸將之驍勇有謀素為士卒之所信服

者各將所部分據要害之地使緩急首尾相應可以抗敵將不足則募大小使臣武舉及第或曾立邊功者名問方略擢而用之二也遣畿甸禁兵不足則揀擇雜役諸色廂兵之強壯者又不足則起河北及畿甸保甲又不足則募民之願為兵者務令數多張大形勢使人莫測又以羽檄起天下兵盡赴京畿使無外重內輕之患三也恃河以為固旁近州縣屯宿重兵營壘相望以衛京師持重養威勿與之戰待其糧竭勢衰然後議之四

也屯戍將兵糧餉錢帛皆自中都應副優加撫恤勿使
闕乏別置將兵防護餉道五也並河州郡選擇守臣素
有風力可委任者易去疲懦許以便宜從事在朝無其
人則召自外方起於閒廢務在協力公心推選六也募
文武小官有膽智辭辨者授以高爵奉使兵間卑辭重
幣復約和好以緩師期使吾事可辦七也河北諸郡令
堅壁清野人民入保使進無所獲糧餉有時而窮敵人
之衆難以持久八也按地圖相形勢命並塞諸道控制

要衝扼其歸路擾其餉道使退有所虞不敢深入九也
夏戎窺伺中國久矣乘我之釁安知無跳踉之心今起
西兵而召其將帥彼或謀知敢肆猖獗又生一患則陝
西河東諸路不可不虞十也凡此十策雖腐儒之常談
然不可不察更願陛下召宿將知兵者與廟堂深計之
昔漢文帝時匈奴大入邊乃命周亞夫等三將軍軍霸
上棘門細柳以備胡文帝親勞之禮成而去臣願陛下
命將帥統六師屯於近郊訓練士卒陛下親臨以講武

振揚天聲以勵士氣鎮之以靜臨之以威兵固有先聲而後實者亦一策也夫北人敗盟侵犯邊境自古有之唐太宗時突厥頡利飲馬於渭水去長安不百里太宗興六騎幸渭上逆折之頡利遂遁本朝景德中契丹犯澶淵去都城纔數驛真宗渡河親征契丹遂和何則師直為壯在我者理直而有備士心奮勵氣固足以吞之臣願陛下先留意於自治者而以捍敵為餘事自治之策尤以收人心為先不可以為非今日用兵之急務也

昔者太王居邠狄人侵之事之以皮幣珠玉犬馬而不得免太王曰狄人之所欲者吾土地也去之岐山之下居焉從之者如歸市非得人心則雖將避狄人誰與居况欲合衆智協衆力使將帥忘生卒伍用命士有死志民無離心以捍難制之敵為宗社蒼生之計哉願陛下無忽臣聞良藥苦於口而利於病忠言逆於耳而利於行前事之驗後事之元龜也臣昨於宣和元年任起居郎日因都城暴水變故嘗具狀奏乞陛下寅畏天戒招

徠謹言仍乞因侍立直前奏事區區之意實有所懷以
謂陰氣大則恐有盜賊猖蹶外患頻仍兵革之事不可
不戒有其兆而事未見難於顯言故欲面奏蒙謫降遠
小監當雖抱愚衷不能自達逮今七年而四方兵革之
患如此乃知天人之際不可誣也惟先格王正厥事上
以動天意下以感人心天意人心去就之際間不容髮
動天以實而不以文感人以行而不以言正在今日臣
願陛下萬幾之暇中夜以興仰思祖宗勤勞積累基構

界付之重俯為子孫蕃衍衆多萬世無窮之計留意於
賤臣之言夫心之精微非書之所能盡也陛下清燕之
間何惜榻前咫尺之地不使臣進對得盡其心以報盛
德伏望聖慈特降睿旨許臣不隔班先次上殿及與衆
聚議庶幾芻蕘之言或有涓埃之補臣雖死之日猶生
之年非獨臣之幸乃天下之幸也干冒天威無任戰越
惶懼之至

召赴文字庫祇候引對劄子

宣和七年十二月二
十三日有旨赴都堂

議事記隨筆執赴文字庫
祇候引對具已見劉子

臣伏觀陛下以金國敗盟陷沒燕山重兵壓境邀求必不可從之事欲恢中原而取河北淵衷震悼深悔前非下哀痛之詔罷不急之務蠲繁苛之令除培克之法招徠忠黨之言討論捍禦之策命皇太子作牧開封以係天下之望誠意惻怛感動天地慰安人心雖堯舜修己以安百姓禹湯罪己以撫萬方無以過也然臣以謂事勢迫矣結轡已深遣使講和必無可和之理長蛇封豕

蓄銳深謀待時而發其意不淺而自河以北守禦蕭然
無藩籬之固不知何以禦之今日之策所謀得則宗社
安所謀失則宗社安危之機間不容髮臣願陛下審
料事勢度以聖心之所能行者深計利害而明白行之
無為苟且僥倖覆藏隱諱以趨禍亂庶幾可以轉危而
為安則天下蒼生無肝腦塗地之患宗廟社稷無淪胥
以亡之虞皆在決於陛下方寸間耳臣愚以謂今日之
策有三上策莫如親征講求真廟幸澶淵故事選將勵

兵躬臨訓練降詔問罪涓日啓行以懼戎心以鼓士氣
驅逐醜類保完舊疆此上策也中策莫如堅守夫京師
天下之根本也宗廟社稷朝廷宮室之所在百官之所
聚密邇陵寢中四海而臨萬邦高城深池有金湯之險
聯營環衛有虎貔之師運漕東南以足財用控制西北
以威四方天下無二舍此安歸定堅守之計勵士民之
心效死為期無毫髮欲去之意既務鎮靜又施權謀遣
帥出師分屯傍近要害之地翼衛帝室設使虎狼之衆

敢肆憑陵當如周亞夫禦七國之策堅壁勿戰以挫其鋒待其糧竭力衰邀其歸路多設方略一鼓破之此中策也下策為避狄之計如太王去邠而居岐臣有所不忍言然道塗間巷之人戶知之臣亦疑聖意或出於此何哉比者不議河北守臣而先議東南守臣一也遣使分起諸路兵而不起淮浙兵二也撻攔汭汴舟船三也建牧四也為此策者雖足以紓一時之急然知其利而不知其害也臣竊痛曾不深計而熟念之也委陵寢宗

廟社稷朝廷宮室百官萬民而去之遠邇必潰是以中原
畀之豺狼也事勢一去不可復振臣恐京師朝行而
夕亂其禍故可勝言哉陛下雖命皇太子建牧以監之
何補於事是不若偕行之愈也必不得已臣有愚計顧
恐陛下不能行之臣今日言之儻不契聖意必死於斧
鉞不言之異日禍敗必死於亂兵與其死於亂不若死
於國臣敢冒萬死為陛下試陳其說陛下欲行避狄之
計而命皇太子留守以係人心以捍大敵以保陵寢宗

廟社稷是也而建以為牧非也本朝及唐故事皇帝行幸郡國則皇太子監國此特國家閒暇之時典禮如此今大敵入寇天下震動安危存亡呼吸間而用平時典禮可乎名分不正而當大權稟命則不威專命則不孝何以號召天下率勵豪傑與之以死抗敵期成功於萬分之一哉唐明皇避安祿山之難而入蜀父老擁馬乞留太子以討賊而肅宗有靈武之立勢不得不然當時之議曾不早定後世惜之陛下度今日人心已搖可以

與之共患難而堅守則守而弗去可也度不能守則胡
不假皇太子以位號使為陛下保守宗社收將士心以
死捍敵臣竊觀皇太子仁孝夙成恭儉好學四海屬心
如臣之計天下可保在此一舉夫父子之間人所難言
今日之事寧復有大於此者乎臣素愚直感戴大恩所
以不避重誅為陛下言此者欲陛下深思而定之於早也
交遜之際燦然明白而使宗廟社稷有所依歸四海蒼
生有所係屬陛下如釋重負享安逸於無窮而以死宗

廟社稷之事責皇太子與天下之士大夫豈不美哉敵情難測卒然有急然後議之則無及矣易曰知進退存亡而不失其正者其惟聖人乎伏惟陛下聖德高妙臣固知黃屋不足以縷紼帝堯之心所以敢言者正恃陛下體道而輕外物也昔田千秋以一言而悟武帝而巫蠱之禍息臣頃以論水去國七年今日之事適在朝列以上封事朝奏暮召以螻蟻之微敢言大計豈非祖宗神靈啓悟臣心使之如此其敢愛死不自比於田千秋

哉謹刺血親書干冒天威無任戰越俟死之至取進止

梁谿集卷四十一

欽定四庫全書

梁谿集卷四十二

宋 李綱 撰

表劄奏議四

上淵聖皇帝實封言事奏狀

乞尊崇道君太上皇帝尊號狀

論禦寇用兵劄子

上淵聖皇帝實封言事奏狀

宣和七年十二月二十四日淵聖皇帝受

內禪公二十六日
上實封言事奏狀

右臣伏觀皇帝陛下誕膺天命撫臨萬邦天地神祇永有依歸華夏蠻貊永有承事神人交慶海寓騰歡道君皇帝體道法古因天順人不貳不疑傳付大器授受之際燦然明白雖堯之禪舜何以加此下視漢唐無足比數此誠宗社之休而生靈之福也然臣竊謂陛下主鬯春宮茲踰十年孝友之美實形四方英偉之姿久動羣聽道君皇帝眷佑一德方茲艱難付以宗社生靈之寄天之所歸豈曰人力然而方今外患憑陵中國勢弱奸

邪充斥君子道消法度綱紀蕩然無統陛下履位達當
斯時得上應天心下順人欲外攘四裔使中國之勢
尊內誅姦邪使君子之道長以副道君皇帝所以付託
陛下之意哉邇者道君皇帝下罪己詔罷不急之務蠲
煩苛之令除陪克之法招徠忠讜之言討論捍禦之策
唱於前陛下不可不和於後造於始陛下不可不續於
終正猶堯之禪舜論共鯀兜苗之罪皆在堯時而四罪
之誅使天下咸服必居舜日然後元凱可進法度可修

四目可明四聰可達庶政惟和萬邦咸寧以成垂拱無
為之治仰惟道君皇帝既已為宗社生靈之故親御翰
墨悔前日之非播告四方不匿厥旨矣則夫左右恩寵
之臣造作邊事養成禍胎屢覆王師貽患宗社有如童
貫者招權怙勢首為兵謀以佞倖之姿據師保之任有
如王黼蔡攸者以穿窬之質挾奸雄之謀作奇技淫巧
以蕩上心運花石竹木以歛民怨有如朱勔者豪奪民
田掊歛財賄剝下奉上依勢作威有如李彥者恃寵眷

之私擅威福之柄招兵自衛失禁旅之心有如高俅者
罪實比於四凶誅宜行於兩觀陛下以其久在道君皇
帝左右之故未欲誅殛亦宜流竄遠方以正典刑而自
即位以來今已累日寂然未聞決斷之詔羣心憂疑其
何以仰副道君皇帝畀付之意上應天心下順人欲而
使四方知中國之威遠巡而不敢進哉臣愚伏望陛下
運以乾剛照以離明為宗社生靈大計斷而行之天意
昭答人心悅服則外侮不難禦矣昔孔子為魯司寇七

日而誅少正卯今陛下即位累日而未行虞舜之政臣竊惑之至於宰相臺諫之臣亦宜罷黜慎擇其人以協惟新之政何則天下之事惟宰相可行而臺諫可言坐乎廟堂之上與天子相可否者宰相也立乎殿陛之間與天子爭是非者臺諫也宰相得行其道臺諫得行其言一失其職則為宰相者何以揆百官而撫四夷為臺諫者何以糾官邪而諫王惡冒寵尸祿無補國家噤默不言致危宗社其罪豈淺淺哉臣竊觀道君皇帝深悼

前失欲收天下之心而降哀痛之詔罪已之言所不忍
聞仰讀之人為之掩泣此誠禹湯之用心也抑畏之極
至於感疾遜位退居舊宮人主如此而宰相臺諫之臣
偃然如故恬不為怪此何理也譬猶庸醫之療病已致
人於危困猶且顧視財賄自為身謀不忍捨去而慮他
人之軋已也求病之瘳豈可得哉為今之計正宜博採
深訪求人於閒廢踈賤之間所謂擢卒為將拔士為相
者正今日急務也惟陛下留神幸察臣愚戇無取惟好

讀書深考古人論議天人之際竊有所見往年任起居
郎日因都城暴水變異至大嘗具狀奏乞因侍立直前
奏事區區之誠以謂陰氣太盛恐有盜賊跳踉兵革之
事有其兆而未見難於顯言故欲面奏尋蒙謫降惓惓
之忠無以自達去國七年而盜賊跳踉之患相仍如此
乃知天人之際若合符節不可誣也請以比年以來天
人之際及今日之事為陛下詳言之崇寧之間蚩尤之
旗見其長半天宣和之初赤氣夜起自西北至於東南

此皆兵象禍大而應遲今年冬日之至熒惑入南斗端
誠殿稱賀梟鳴於廷此皆不祥之兆惟正心修德大有
變革乃能銷弭禍故導迎福祥昔宋景有善言三而熒
惑為之退三舍此必至之理不可忽也陛下傳位之初
前兩日昏翳四塞日光不明陰慘之氣無風而慄至暮
日入赤光散溢此君道衰弱議論未決之兆也陛下即
位之日日暈五色帶黃赤珥兩日相摩正同藝祖受命
之應此天人協贊之符也然而御垂拱殿見羣臣之後

蒙氣四起暴風從西北來越翼日天氣清潤日華騰輝
明而未融方中蒙氣復作至暮乃散臣竊以法推之日
者君象君以剛明為道君道明則日光盛而羣陰伏今
如此者殆陛下即位之初退託謙損未揔權綱之所致
也平時猶可如此今勢迫急戎馬寇邊日有變故乃宗
社安危之秋豈可平時比哉上天垂象所以警戒陛下
者甚厚願陛下察臣前之所言密詔親信大臣條具過
惡之甚者明正典刑過惡之輕者量加貶謫然後下寬

大之詔一切不問其餘以安反側則主勢強而天意得人心服矣推此以往雖致極治之太平可也臣素愚直為衆所知方陛下聽政之初昧死上狂言惟陛下赦其罪而取其忠天下不勝幸甚取進止

乞尊崇道君太上皇帝尊號狀

某伏觀道君皇帝斷自淵衷傳位皇帝交遜之際燦然明白雖堯之禪舜無以過此下視唐之諸帝夫何足言某竊以謂名號之稱宜極尊崇以彰盛德伏請尊崇道

君皇帝曰道君太上皇帝道君皇后曰道君太上皇后
務合典禮以昭示四海而垂無窮伏乞朝廷詳酌名百
官赴尚書省集議施行

論禦寇用兵劄子

宣和七年十二月二十八日有旨召對延和殿進呈

臣伏見金國敗盟大兵入寇郭藥師以常勝軍叛遂陷
燕山人馬兩項決策深入一項自北方入者圍安肅軍
犯中山府以窺河北一項自西北方入者破代州犯太
原府以搖河東兵勢迫急宗社可憂而廟堂大臣紛然

驚擾初無禦賊先定之計所布命令皆失事機使四方
無所適從萬民無所歸仰而陛下初即大位退託謙損
未奮乾剛威信未立號令未行賢材未登姦邪未去其
何以禦捍大敵保守宗社以副道君皇帝付託之意臣
不敢遠引前古多設蔓詞以瀆天聽謹以管見具方今
禦敵用兵之急務畫一條陳實皆至計伏望聖慈特賜親
覽有可採者推而行之天下不勝幸甚今具畫一下項
一今來金國入寇合為固守之策遣帥命將召募兵

夫廣張聲勢聯營接壘屯駐要害之地堅壁深塹
勿與爭鋒待其糧竭氣衰徐議攻戰絕其餉道扼
其歸路使之驚顧一鼓破之如漢用周亞夫破七
國之策前漢亞夫列傳可以為法

一今來金國遣使有所邀求臣雖不能知其所邀何
事然以意料之不過五事欲求尊大之禮一也欲
得歸明之人二也欲厚邀歲幣三也言我首敗盟
約過失四也欲求割河北之地五也臣愚竊以謂

金國欲求尊大之禮當屈體事之如文王之事獯
鬻以紓一時之急無不可者欲求歸明之人當盡
與之遣兵裹送以示大信我辭既直而可以無狼
子野心之虞養濟匱財之患一舉而三策兼得無
不可者欲厚邀歲幣當答以舊約以燕雲歸中國
故歲幣所以加倍於大遼今既敗盟盡取燕雲之
境豈可復增歲幣為兩朝赤子之故不敢愛惜且
如舊約已為過厚至於欲求割地則祖宗境土為

人子孫當固守之雖尺寸之境豈可割以遺人夫
彼之貪婪無厭設使割地復有所求將何以賂之
又河北燕山接境惟賴塘泊為固今悉以與之則
險阻之地盡在彼何以立國當擇辨士奉使以死
爭之

一今來禦捍大敵當擇大帥三人以朝廷大臣為之
一人帥大河以北屯於真定一人帥大河以南屯
於瀋滑一人帥河東屯於澤潞許以便宜從事不

從中制所統將兵各以十萬為率據要堅守慎勿
與戰使其有所顧望不敢深入設使深入絕其糧
道徐議攻戰度為萬全然後舉師彼必退遁

一諸將統兵每將以五千人為率擇有權略武勇為
士卒信服者使為之人材不足則召募武舉及第
并曾立邊功之人召問方略擇相貌耆虎識見高
遠者隨材錄用責以功效

一諸路募兵全未辦集欲乞先會計畿甸禁兵及選

諸色廂軍可用者充及起保甲出內府錢帛召募畿甸之民刺手權充鄉遂之兵優與贍給事畢放還歸農以二十萬為率與已起發兵通為三十萬分隸三大帥諸路有召募到兵續次分撥及屯駐畿甸

一軍前糧草錢帛各選差轉運使副各一人專行管構計置並自中都應副不得搔擾逐路人民及乞降見錢委京東西淮南兩浙轉運司高價糴買斛

斗應粟米大麥黑豆皆可充數多方和雇計置舟
船京東自五丈河西京自蔡河淮浙入星夜疾速
起發應副仍每路料定數目辨集優與推賞

一諸路兵器並召募人管押上京赴軍器監納優與
酬獎

一畿甸并近京州縣應官戶馬許留一足其餘并私
戶馬並籍定拘收優給價直分給將士

一並河州郡具見今守臣姓名揀擇內有疲懦癯老

之人選差素有風力强幹者換易許以便宜從事
在朝無其人則召自外方起於廢閒務在協力公
心推選

一河北河東郡縣今堅壁清野人民入保使虜掠無
所獲糧餉有時而窮深入之衆難以持久

一沿邊並塞諸郡按地圖相形勢使各聚兵控制要
衝扼其歸路擾其餉道使有所顧望不敢深入
一夏戎窺伺中國已久乘我之釁安知無跳踉之心

當議備守

一國家四京惟西京城壁不備密邇陵寢理宜修備以嚴拱衛之勢當詔守臣用見兵及募人修備責以近限乘此農隙可以集事此最不可緩之策

一京畿屯兵及見在禁旅宜於近郊講武訓習車駕臨幸以賞勸之勞問將帥如漢文帝勞周亞夫故事

一措置將帥馬如已辦集宜下親征之詔以鼓士氣

以懼敵心如本朝真宗親幸澶淵故事

一近降赦書麻制詞臣不工叙述無法全不曾該載
道君皇帝以憂勤感疾遜位陛下主鬻春宮膺受
天命之意道君皇帝傳位手詔行遲而赦書行速
臣恐四方疑於觀聽欲乞別降手詔叙述詳備指
事明白依赦書例日行五百里以解四方之疑

一近降哀痛手詔集四方勤王之師許令知州縣令
募兵赴難竊恐天下搔動別致不虞欲乞降詔罷

之起州郡見在禁兵及福建槍杖手湖南北峒丁
仍仰安撫鈐轄司選差武臣管押赴闕

一近遣密諭官事屬搔擾欲乞並罷有所調發只直
降詔旨委本路監司知通當職官應副施行

一今來探報賊兵入境祇是憑常日馬遞急脚遞鋪
兵丁深慮不可憑仗探報失時欲乞逐州各置烽
火卓望及差人兵別作一項作白旗子探報給降
銀字牌為號優與請給

一東南漕運饋餉京師控引江湖道里遠涉全賴發
運司措置應副宜選公忠強幹素有風績之人委
以轉輸大計如唐韓滉以鎮海軍節度使兼領諸
道鹽鐵轉運等使事在唐韓滉本傳可以為法
右件所陳畫一捍禦大寇二十事皆當今之急務宗社
之大計伏望陛下降臣章與大臣議詳擇施行取進止

梁谿集卷四十二